

**FN-ip inuit innarluutillit pisinnaatitaaffii pillugit aalajangersagaanut Nunatta malitsitsinissaa qulakkeerniarlugu nuna tamakkerlugu iliuusissatut periusissiamik kingusinnerpaamik UPA 2020-mi saqqummiunneqartussamik Naalakkersuisut suliaqarnissaat pillugu Inatsisartut aalajangiiffigisassatut siunnersuut.**  
(Inatsisartuni Inuit Ataqtigiit ilaasortaataanniit saqqummiunneqartoq)

### **Akissuteqaat**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

### **Aappassaaneerneqarnera**

Isumaliutissiissut peqqissaartoq pillugu Naalakkersuisut Ilaqutariinnermut Peqqissutsimullu Ataatsimiititaliaq qutsavigiumavaat.

Naalakkersuisut akissuteqaamminni isumaqatigiissutip malinneqarsimanera pillugu nalunaarusiorsimanertik erseqqissaraat Ilaqutariinnermut Peqqissutsimullu Ataatsimiititaliap isumaliutissiissummini innersuussutigaat.

Meeqqat pisinnaatitaaffii pillugit Naalagaaffiit Peqatigiit isumaqatigiissutaata ilanngunneqarnerani aningaasaqarnikkut allaffissornikkullu kingunerisassat pillugit nalunaarusiaq innersuussutigineqarmat Naalakkersuisut erseqqissassavaat. Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaata ilanngunneqarnerani aningaasaqarnermut allaffissornermullu aningaasartuutissat pillugit misissuisoqarnikuunngilaq.

Inunnut innarluutilinnut suliaasaqarfik pillugu piviusorsiortumik eqqortumillu pilersaarummik suliaqassagaanni, pissutsinut piviusunut itisuumik ilisimasaqarnissaq piumasaqaataassasoq Naalakkersuisut sulii isumagaat.

Massakkut malinneqarnera pillugu qulaajaasoqarnissaanik kiisalu malinneqaqqinnissaanut iliuusissanut pilersaarummik suliaqartoqarnissaata tuaviornerpaamik pinissaa pillugu ataatsimiititaliap oqaaseqaataa, Naalakkersuisut isumaqatigaat

Taamaammat Ilaqutariinnermut Peqqissutsimullu Ataatsimiititaliami amerlanerussuteqartut allannguutissatut siunnersuut saqqummiussaata Naalakkersuisut ilalerpaat.

Naalakkersuisut taamatut oqaaseqarlutik siunnersuut Inatsisartuni suliareqqitassanngorlugu tunniuppaat.